

DOMINGU XXII TEMPU KOMÚN – TINAN A

Tema

Liturjia Domingu XXII Tempu Komún nian konvida ita atu deskobre “krús nia babulak”: asesu ba moris loos no nakonu ne’ebé Maromak hakarak oferese mai ita liu husi dalam domin nian no dalam moris nian (krús).

Iha *leitura dahuluk*, profeta ida Israel nian (Jeremias) deskreve ninia esperiénsia “krús” nian. Jahwéh nia sedusaun ho liafuan midar, halo Jeremias fó nia moris tomak ba Maromak nia servisu no Ninia projetu sira. Iha “dalam” ne’e, nia tenke enfrenta ema kbiit-na’in sira no sadik lójika mundu nian; tanba ne’e, nia tenke terus, eksperimta solidaun, persegisaun... Ne’e mak ema hotu ne’ebé simu Jahwéh iha fuan no moris iha koerénsia ho Maromak nia valór sira nia esperiénsia.

Leitura daruak konvida sarani sira atu oferese moris loroloron nian ba Maromak. Paulo garante katak ida-ne’e mak sakrifisiu ne’ebé Maromak prefere. Oferese moris loroloron, tuir Paulo, signifika katak, ita la konforma ita nia an ho lójika mundu nian, ita aprende atu dixerne Maromak nia planu sira no moris tuir.

Iha *Evanjellu*, Jezús aviza dixípulu sira katak dalam moris loos nian la liu husi triunfu no ézitu umanu, maibé liu husi domin no don moris nian (to’o mate, se karik presiza). Jezús liu husi dalam ne’e; no ema ne’ebé hakarak sai ninia dixípulu tenke aseita atu la’o iha dalam hanesan.

LEITURA I – Jer 20,7-9

Jeremias, profeta moris iha Anatot iha + tinan 650 mK, hala’o ninia misaun profétika husi 627/626 mK, no to’o tempu Babilónia harahun Jerusalém (586 mK). Profeta hala’o nia misaun iha reinu Judá (liuliu iha sidade Jerusalém).

Faze dahuluk Jeremias nia pregasaun nian abranje parte Josias nia ukun. Liurai ne’e ho ninia preokupasaun atu defende identidade polítika no relijioza Maromak nia Povu nian, lori reforma relijioza hodi halakon maromak falsu rai-li’ur nian. Jeremias nia mensajen, iha período ne’e, haktuir nu’udar apelu ba konversaun, ba fidelidade ba Jahwéh no ba aliansa.

Iha tinan 609 mK, Josias mate iha kombate hasoru Ejitu. Joaquim mak troka nia. Faze daruak atividade profétika Jeremias nian abranje tempu Joaquim (609-597 mK) nia ukun.

Joaquim nia ukun mak tempu desgrasa no salan nian ba Povu, no tempu inkomprensaun no terus nian ba Jeremias. Iha faze ne’e, profeta mosu hodi kritika injustisa sosiál sira (ne’ebé dalaruma liurai mak halo) infidelidade relijioza (halo aliansa polítika ho kbiit rai-li’ur no la konfia iha Maromak). Jeremias konvensidu katak Judá hakat liu sasukat hotu no invazaun husi Babilónia nian hakbesik daudaun ne’ebé sei kastiga Maromak nia Povu nia salan sira. Ne’e mak buat ne’ebé nia hateten ba makhorik sira Jerusalém nian... Jeremias nia previzaun sira konkretiza iha tinan 597 mK: Nabucodonosor invade Judá no deporta ba Babilónia parte ida populasauun Jerusalém nian.

Iha tronu Judá nian, Sedecias (597-586 mK) tuur. Faze datoluk misaun profétika Jeremias nian hala’o iha período ukun ne’e nian.

Liutiha tinan ruma submisaun hakmatek nian ba Babilónia, Sedecias koko fali polítika tuan aliansa nian ho Ejitu. Jeremias la konkorda atu tau laran-metin iha kbiit estranjeiru liufali Jahwéh. Maibé liurai no boot sira la fó atensaun ba profeta nia opiniaun. Hetan konsiderasaun nu’udar “profeta desgrasa nian”, Jeremias konsege kria de’it inimigu iha nia sorisorin.

Iha 587 mK, Nabucodonosor tau serku hale'u Jerusalém; tropa Ejitu nian mai tulun Judá no Babilónia nia tropa sira retira nia serku. Iha momentu ksolok boot nasional nian, Jeremias fó sai katak Babilónia sei mai fali serku no harahun Jerusalém (kf. Jer 32,2-5). Hetan akuzasaun traisaun nian, sira hatama profeta Jeremias iha kadeia (kf. Jer 37,11-16) no hetan perigu lakon nia moris (kf. Jer 38,11-13). Enkuantu Jeremias kontinua haklaken atu Judá rende, Nabucodonosor foti Jerusalém, harahun sidade no deporta ninia populasau ba Babilónia (586 mK).

Jeremias mak paradigma profeta sira ne'ebé sofre tanba Maromak nia Liafuan. Ho natureza sensível no kordiál, ema dame nian, ne'ebé hakarak familia hakmatek no konvíviu ho belun sira, Jeremias la'ós ema konfrontu nian, agresaun nian, violénsia iha liafuan no jestu sira; maibé Jahwéh bolu nia atu “fokit no harahun, atu hamohu no sobu” (Jer 1,10), atu ko'alia sai kona-ba desgrasa sira no haklaken, ho violénsia, destruisaun no mate (kf. Jer 20,8). Nu'udar konsekuénsia, nia sai nafatin objetu desprezu nian no ema hotu fó malisan ba nia. Familiár sira, belun sira, profeta falsu sira, povu tomak, hadook an husi nia, bainhira nia lokeibun. No ema di'ak ne'e, sensível no delikadu terus maka'as ba abandonu no solidaun ne'ebé misaun profétika lori ba nia.

Jeremias apaixonadu tebes ba Jahwéh nia Liafuan no nia la deskansa se nia la haklaken ho fidelidade. Maibé iha momentu sira solidaun no frustrasaun nian, profeta Jeremias husik atu nia laran-susar iha fuan sa'e to'oibun no nakfilak iha liafuan sira. Nia dirije ba Maromak no haksiak Maromak tanba problema sira ne'ebé mai hamutuk ho misaun ne'ebé nia iha. Nia kompara an ho feto-raan inosente no injénua ida, iha-ne'ebé Maromak kaer no obriga halo buat ruma ne'ebé profeta lakohi (kf. Jer 20,7-9).

Iha Livru Jeremias nian mosu, hamutuk, profeta nia denúnsia/kesar no halerik sira, ne'ebé hetan kondensasaun ba moris ida frakasu nian. Testu balun ita koñese nu'udar “konfisaun Jeremias nian” no sai loos duni nu'udar profeta nia halerik ba Jahwéh, ho sinseridade no rebeldia, ninia deziluzau, ninia laran-susar no frustrasaun (kf. Jer 11,18-23; 12,1-6; 15,10.15-20; 17,14-18; 18,18-23; 20,7-18). Testu ne'ebé ohin propoin mai ita halo parte ba “konfisaun” sira ne'e ida.

MENSAJEN

Testu apresenta mai ita Jeremias nia orasaun nakonu ho preokupasaun iha momentu ida deziluzau no dezánimu nian (karik iha momentu Sedecias nia minstru sira kaer nia no soe iha posu ho tahu laran – kf. Jer 38,4-6).

Orasaun estraña ne'e foti forma denúnsia eh akuzasaun profeta nian hasoru ninia Maromak. Akuzasaun ne'e formula liuhusi ilas “sedusaun” (intenta ema atu monu) nian: hanesan hatudu Jahwéh namora ho profeta ne'e to'o pontu atu sedús nia (verbu “pth”, uza iha-ne'e, aparese iha Ex 22,15 atu ko'alia kona-ba feto-raan ida nia sedusaun). Maromak penetra iha profeta nia moris, pressiona nia, tau nia iha nia ukun nia okos, domina nia no profeta la hatene oinsá reziste ba Maromak nia tentativa/assaltu sira (verb “ykl”, uza iha vers. 7 atu define forma oinsá Maromak atua ho profeta, signifika “ezerse poder”, “manán ema ida”, “domina”). Profeta, kondisionadu ho Maromak sedutór nia promesa sira, la iha kbiit atu reziste ninia “charm” eh enkantu no Ninia jogu sedusaun nian, iha presau, domíniu, no kbiit nia okos, nia entrega an kompletamente iha Ninia liman sira no dedika moris tomak ba Ninia servisu.

Sá loos mak profeta manán ho entrega ne'e? La manán buat ida. Maromak ne'ebé sedús nia, ne'ebé obriga nia atu dedika moris ba servisu profétiku, abandona nia iha moris mukit no husik nia iha inimigu sira nia liman ho sira-nia insultu no trosa/zombaria (halo pouku). Profeta sente deziluzau no laran-kraik... Deziluzau ne'e hatudu sai ho rezolusaun firme atu reziste ba sedutór nia lian: “ha'u sei la ko'alia tan kona-ba nia, ha'u sei la ko'alia tan hodi nia naran” (vers. 9). Profeta konsege duni lori to'o rohan ninia propóritu ne'e?

Lae. Domin ba Maromak no ba Ninia Liafuan moris iha profeta nia fuan nune'e la serve buat ida atu reziste: "nia buka atu hanehan, maibé labele" (vers. 9). Maromak nia Liafuan mak ahi ne'ebé han, sunu profeta nia fuan no la husik atu nia deziste husi misaun no haksumik an iha moris kómodu no la hasusar an. Buat ne'ebé profeta tenke halo mak kontinua servi Liafuan, hodi enfrenta ninia destinu solidaun no sofrimentu nian, iha esperansa atu, tuir nia dalan, nia bele hetan hikas Maromak nia domin ne'ebé loron ida sedús nia no profeta la hatene oinsá reziste.

LEITURA II – Rom 12,1-2

Depoizde apresenta ninia katekeze kona-ba projetu salvasaun ne'ebé Maromak iha ba ema hotu (kf. Rom 1,18-11,36), Paulo halo konsiderasaun ho karáktek prátiku liu, atu hatudu oinsá mak ema ne'ebé simu bolun ba salvasaun tenke moris.

Indikasaun prátika sira-ne'e mosu iha parte daruak Surat ba sarani sira iha Roma (kf. Rom 12,1-15,13). Paulo apresenta diskursu naruk ida hodi bolu sarani Roma nian (no sarani hotu) atu iha komportamentu/hahalok tuir sira-nia kondisaun sarani nian. Adere ba Kristu no hakohak salvasaun ne'ebé Nia oferese, la signifika hela de'it iha kampu teórik no abstratu, maibé, ezije komportamentu koerente ho valór sira Jezús nian no ho moris foun ne'ebé Nia oferese. Adezaun ba Jezús implika asume atitute sira, iha momentu oioin no situasaun moris loroloron nian, nu'udar espresaun ezistensial dinamizmu moris foun ne'ebé simu husi batizmu.

Testu ne'ebé ohin propoin mai ita mak introdusaun ba parte daruak Surat nian no ba reflesaun prátika kona-ba ezijénsia sira dalan moris nian nu'udar batizadu. Nia sai ponte entre parte teórika (parte dahuluk surat nian) no parte prátika (parte daruak surat nian).

MENSAJEN

Maromak nia laran-di'ak no domin (ne'ebé Paulo ko'alia barak iha parte uluk ninia surat nian) konvida ema atu fô resposta ida. Oinsá loos resposta ne'e tenkesér?

Paulo konvida sarani sira atu oferese sira nia an rasik (literalmente "imi-nia isin". "Isin" iha-ne'e la'ós parte ida haketak husi klamar, maibé ema iha ninia totalidade, enkuantu ema relasaun nian. Nu'udar ema mak relasiona ho Maromak, ho ema seluk no ho mundu). Sarani sira mak ema sira ne'ebé entrega an kompletamente iha Maromak nia liman no, iha momentu hotu sira-nia ezisténsia nian, moris ba Maromak.

Oferta ne'e sai "sakrifisiu moris, santu no monu ba Maromak nia laran". Ne'e mak "kultu espirituál" (bele tradús nu'udar "kultu lójiku" eh "razoável") ne'ebé Maromak hein husi ema. Adjetivu Paulo uza, atu marka diferensa entre kultu formál no esteriór, ne'ebé la kompromete ema no kultu loos, ne'ebé sai husi fuan no kompromete ema tomak (kf. Am 5,21-25; Os 6,6; Jo 4,23-24). Fiar-na'in sira tenke oferese sira-nia moris tomak ba Maromak; no ida-ne'e mak kultu ne'ebé Maromak hein husi sira ne'ebé nia hatudu laran-sadia no haraik salvasaun.

Ba Paulo, oferese moris tomak ba Maromak, signifika uluknanai, la halo tuir "mundu ne'e" – katak, mantein distánsia krítika ida iha relasaun ho eskema sira mundu nian no valór sira ne'ebé mundu egoizmu no salan nian harii. Daruak, signifika, mudansa ida fuan nian, mentalidade no inteligénsia nian, ne'ebé halo ema iha kbiit atu dixerne sá loos Maromak nia vontade, atu bele la'o tuir nia dalan sira ho fidelidade.

Nune'e, "kultu espirituál" mak, entrega moris tomak ba Maromak. Iha ninia relasaun ho Maromak, ho ema seluk no mundu, sarani tenke hakribi dalan sira egoizmu nian, orgullu nian, autosufisiénsia nian, injustisa no salan nian; no tenke buka hatene Maromak nia projetu sira, simu iha fuan no moris iha koerénsia totál ho Ninia proposta sira.

EVANJELLU – Mt 16,21-27

Epizódiu ne'ebé Evanjellu ohin nian propoin mak kontinuasaun domingu kotuk nian. Iha Mt 16,13-20, comunidade dixípulu sira-nian espresa sira-nia fiar iha Jezús nu'udar “Mesias, Maromak nia Oan” (no iha fiar ne'e mak harii Kreda); oras-ne'e, Jezús esplika ba grupu dixípulu sira-nian sentidu auténtiku ninia mesianizmu no ninia filiasaun divina.

Ita sei kontinua iha parte “instrusaun kona-ba Reinu” (kf. Mt 13,1-17,27); ho epizódiu ne'e, ita hahú sesaun iha-ne'ebé privilejia katekeze kona-ba destinu krús nian, ne'ebé mosu daudaun iha Jezús nia oin (kf. Mt 16,21-17,27).

Iha faze ne'e, ema lubun boot sira husik Jezús no líder sira deside rejeita Jezús. Sira ne'ebé kontinua akompaña Jezús mak grupu dixípulu sira nian. Sira fiar katak Jezús mak “Mesias, Maromak nia Oan” no hakarak partilla Ninia destinu glória no triunfu nian. Jezús esplika ba sira katak Ninia mesianizmu la liu husi triunfu no susesu umanu maibé, husi krús (kf. Mt 16,21-17,21); no aviza ba sira katak moris nu'udar dixípulu husu atu la'o tuir dalan entrega no don moris nian (kf. Mt 17,22-27).

Mateus hakerek nia Evanjellu ba comunidades sarani iha finál sék. I (tinan 80/90). Komunitade sira-ne'e haluha tiha sira-nia laran-manas inisiál no akomoda an iha kristianizmu ida morna no ladún ezijente. Ho tempu difisil ne'ebé besik daudaun (persegisaun sira iha finál sék.I), sarani sira presiza hanoin katak dalan sarani la'ós dalan ida fasil, la'o iha susesu no aplauzu nia leet, maibé dalan ida difisil, ne'ebé ezije atu loroloron, entrega an no halo moris don ida.

MENSAJEN

Ita-nia testu bele fahe ba parte rua. Iha ida uluk (vers. 21-23), Jezús fó sai ba dixípulu sira Ninia paixaan; iha daruak (vers. 24-28), Jezús apresenta instrusaun kona-ba signifikadu no ezijénsia sira sai dixípulu nian. Parte dahuluk hahú ho Jezús nia anúnsiu katak dalan moris-hi'as nian liu husi sofrimentu no mate iha krús. Depoizde Jezús nia konfrontu ho líder judeu sira-nian no ho sira-nia rejeisaun ho forma absoluta ba proposta Reinu nian, evidente katak judaísmu hanoin kona-ba Jezús nia eliminasaun fízika. Jezús konxiente kona-ba ne'e; maski nune'e, Nia la deziste atu lori ba oin projetu Reinu nian no fó sai katak hakarak kontinua apresenta, to'o rohan, Aman nia planu sira.

Pedro la konkorda ho finál ida nune'e no teri Jezús atu la'o hasoru Ninia destinu krús nian. Pedro nia opozisaun (no dixípulu sira-nian mós, basá Pedro kontinua sai portavós comunidade nian) signifika katak ninia komprensaun kona-ba mistériu Jezús nian seidak perfeita. Ba nia, “Mesias, Maromak nia Oan” nia misaun mak misaun glória no manán-na'in nian; no, iha Pedro nia lójika – katak lójika mundu nian –vitória labele mai husi krús no husi don moris nian.

Jezús dirije ba Pedro ho liafuan toos, basá dixípulu sira presiza korrije sira-nia perspetiva kona-ba Jezús no kona-ba Aman nia planu ne'ebé Ni amai realiza. Maromak nia planu la liu husi triunfu umanu, la liu mós husi eskema poder no domínio nian; maibé Aman nia planu liu husi don moris nian no husi domin to'o nia konsekuénsia ikus sira (ne'ebé nia espresaun radikál liu mak krús). Hodi husu ba Jezús atu la hala'o Aman nia projetu, Pedro repete hikas tentasaun sira ne'ebé Jezús esperimenta iha inísiu Ninia ministériu nian (kf. Mt 4,3-10); tanba ne'e, Mateus tau iha Jezús niaibun resposta hanesan ne'ebé, iha tempu ne'ebá, Nia fó ba diabu: “Bá dook tiha, Satanás”. Pedro nia liafuan – hanesan ida diabu nian uluk – hakarak halo sees Jezús husi Maromak nia planu; no Jezús dispostu atu kontra proposta naran de'it ne'ebé teri netik Nia atu konkretiza, ho domin no fidelidade, Maromak nia projetu sira.

Iha parte daruak, Jezús apresenta instrusaun ida kona-ba atitude sira dixípulu nian. Ema ne'ebé hakarak sai dixípulu Jezús nian, tenke “hakribi an rasik”, “lori nia krús” no tuir Jezús

iha Ninia dalan domin nian, entrega no don moris nian.

Katak sá hakribi an rasik? Hakribi an rasik signifika hakribi egoízmu no autosufisiénsia, atu halo moris rasik sai don ida ba Maromak no ba ema seluk. Ema sarani labele moris hodi taka iha an rasik, preokupa de'it atu konkretiza ninia mehi pesoál sira, ninia projetu rikusoin nian, seguransa nian, moris di'ak nian, ézitu/susesu nian, triunfu nian... Ema sarani tenke halo nia moris don ida iha laran-luak ba Maromak no maun no biin-alin sira. Nune'e de'it mak nia bele sai Jezús nia dixípulu no integra iha comunidade Reinu nian.

Katak sá “lori krús” Jezús nian no tuir Nia? Krús mak espresaun ida domin totál ida nian, radikál, ne'ebé fó an rasik to'o mate. Signifika saran moris rasik tan domin. “Lori krús” katak iha kapasidade atu gasta moris – ho forma totál no kompleta – tan domin ba Maromak no maluk sira no atu sira haksolok liután.

Iha finál instrusaun ne'e nian, Jezús esplika ba dixípulu sira razaun tanba sá sira tenke hakohak “lójika krús nian” (vers. 25-27).

Iha fatin dahuluk, Jezús konvida sira atu komprende katak oferese moris tan domin la'ós lakon, maibé manán moris. Ema ne'ebé iha kapasidade atu fó moris ba Maromak no maluk sira la signifika frakasu, maibé manán moris rohan-laek, moris loos ne'ebé Maromak oferese ba sira ne'ebé moris tuir Ninia proposta sira (vers. 25).

Iha fatin daruak, dixípulu sira simu konvite atu komprende katak moris ne'ebé sira goza iha mundu ne'e la'ós moris definitivu. Nune'e, sira labele preokupa atu rai didi'ak nia, kusta karik bá: sira tenke buka atu hetan ona iha rai ne'e, vida definitiva ne'e, liuhusi domin totál no don ba Maromak no maun no biin-alin sira. Ida-ne'e mak meta/finalidade boot ita hotu tenke buka alkansa eh to'o (vers. 26).

Iha fatin datoluk, dixípulu sira tenke hanoin ba sira-nia enkontru finál ho Maromak: iha altura ne'e, Maromak sei fó rekompensa ba opsaun sira ne'ebé sira halo... Mateus nafatin refere ba juizu finál, ba motivasaun ne'e atu tau fundamenu ba ezijénsia étika moris sarani nian.